

Petero I.

O KA EPISETOLE

- ¹ O PETERO, kekahī lunaolelo no Iesu Kristo, i ka poe i puehu liilii, a e noho malihini ana hoi ma Poneto, a ma Galatia, a ma Kapadokia, a ma Asia, a ma Bitunia;
- ² Ma ka ike mua ana o ke Akua, ka Makua, ma o ka huikala ana o ka Uhane, ua waeia mai oukou, i poe hoolohe, a i poe e kapipiia i ke koko o Iesu Kristo; i nui ko oukou alohaia mai, a me ka maluhia hoi.
- ³ E hoomaikaiia'ku ke Akua, ka Makua o ko kakou Haku o Iesu Kristo, no kona lokomaikai nui iho, nana no i hoohanau mai ia kakou, i lana mau loa ai ka manao, ma ke alahouana o Iesu Kristo, mai ka make mai;
- ⁴ I loaa mai ia kakou ka hooilina pau ole, pelapela ole, mae ole, ua hoana e ia ma ka lani no kakou;
- ⁵ Ka poe i malamaia mai e ka mana o ke Akua, ma ka manaoio, i loaa mai ke ola i hoomakaukaia no ka hoikeia mai i ka wa mahope.
- ⁶ Malaila no oukou e hauoli nui nei, oiai nae ua kaumaha oukou i keia wa pokole, no ka hoao pinepine ia mai, i mea e pono ai;
- ⁷ I lilo hoi ka hoao ana o ko oukou manaoio, ka mea i oi aku ka maikai mamua o ke gula pau wale, i hoaoia i ke ahi, i mea e mahaloia'i, a e hoomaikaiia'i, a e hoonanii ia'i i ka wa e ikeia mai ai o Iesu Kristo:

- ⁸ Ka mea a oukou i ike maka ole ai, a ua makemake no nae; a, me ka ike ole aku ia ia, ua manaoio aku no nae oukou ia ia me ka hauoli i ka olioli nani pau ole i ka haiia aku;
- ⁹ E loaa mai ana ka hope o ko oukou manaoio, o ke ola o ko oukou poe uhane.
- ¹⁰ Oia ke ola a na kaula i huli ai, me ka imi ikaika, o ka poe i wanana mai i ka pono e hiki mai ana io oukou nei.
- ¹¹ Ua imi nui no lakou i ka mea a me ka mañawa a ka Uhane o Kristo i hai mai ai iloko o lakou, i kona hoike mua ana mai i ka hoinoia o Kristo, a me ka hoonaniia, mahope o keia mau mea.
- ¹² Ua hoikeia mai ia lakou, aole nae na lakou, na kakou, na mea a lakou i ao mai ai; oia hoi na mea i haiia'ku nei ia oukou, e ka poe hai aku i ka euanelio ia oukou, me ka Uhane Hemolele i hoounaia mai, mai ka lani mai: oia ka na anela i makemake ai e ike iho.
- ¹³ No ia mea, e kaei oukou i ka puhaka o ko oukou naau, e kuoo, a e hoomau i ka lana ana o ka manao, no ke alohaia mai i ka wa e hoikea mai ai o Iesu Kristo;
- ¹⁴ I like hoi oukou me na keiki hoolohe, aole e hoo-like ana ia oukou iho me na kuko kahiko, i ko oukou wa e naaupo ana.
- ¹⁵ Aka, e like me ka hemolele o ka mea nana oukou i koho mai, pela oukou e hemolele ai, i ko oukou noho ana a pau:
- ¹⁶ No ka mea, na palapalaia mai, E hemolele oukou; no ka mea, owau ka hemolele.
- ¹⁷ Ina oukou e hea aku i ka Makua, i ka mea i hoomaopopo me ka ewaewa ole, i kela

kanaka, i keia kanaka, ma ke ano o kana hana ana, e noho oukou me ka makau, i ko oukou noho malihini ana.

18 Ua ike no hoi oukou, aole me na mea popo wale e like me ke kala a me ke gula, ua kuaiia oukou mai ko oukou noho lapuwale ana, mamuli o na mooolelo a ko oukou kupuna mai;

19 Aka, me ke koko waiwai io o Kristo, me ko ke keikihipa kina ole a me ka hala ole:

20 Ua boonohoia oia mamua o ka hookumu ana o ke ao nei; aka, ua hoikeia mai i keia wa hope no oukou,

21 Ma ona la oukou i manaoio aku ai i ke Akua, nana i hoala mai ia ia mai ka make mai, a i hoonani aku ia ia; i manaoio ai, a i lana ai hoi ko oukou manao i ke Akua.

22 I ka malama ana i ka oiaio, ua hoomaemae oukou i ko oukou naau, na ka Uhane mai, i ke aloha hookamani ole i na hoahanau; nolaila, ea, e aloha ikaika loa aku oukou i kekahi i kekahi me ka naau maemae.

23 Ua hanau hou ia mai oukou, aole hoi na ka hua e pala wale ana, aka, na ka hua pala ole, ma ka olelo a ke Akua ola, ka mea e mau loa ana.

24 No ka mea, ua like wale no me ka mauu na kanaka a pau, a o kona nani a pau, ua like me ka pua o ka mauu. E maloo ana no ka mauu. a haule wale iho no hoi kona pua;

25 Aka, e mau loa aku no ka olelo a ke Akua; oia hoi ka olelo i aoia'ku nei ia oukou ma ka euaneho.

2

- ¹ NO ia mea, e haalele oukou i ka opuinoino a pau, a me ka wahahnee a pau, a me ka hookamani, a me ka paonioni, a me ka olelo ino a pau;
- ² E like me na keiki hanau hou, pela oukou e iini ai i ka wain aiai o ka olelo, i mea e ulu nui ai oukou:
- ³ Ina paha, ua hoao oukou he maikai ka Haku.
- ⁴ Ua hele mai oukou io na la, ka pohaku ola, ua haaleleia no nae ia e kanaka, aka, ua waeia mai e ke Akua, he maikai io.
- ⁵ O oukou no hoi, e like me na pohaku ola, ua hoonohonohoa oukou i hale uhane, a i poe kahuna hemolele hoi, i kaumaha aku ai oukou i na mohai uhane, i ka mea oluolu i ke Akua ma o Iesu Kristo la.
- ⁶ Nolaila i i mai ai ka palapala hemolele, Aia hoi, ua hoonoho wau ma Ziona, i pohaku kumu no ke kihi, i waeia, a he mea waiwai io: a o ka mea manaoio aku ia ia, aole ia e hoohilahilaia.
- ⁷ He maikai io ia ia oukou i ka poe manaoio; aka, i ka poe hoolohe ole, o ka pohaku i haaleleia e ka poe hana hale, oia ka i hooliloia i pohaku kamn no ke kihi,
- ⁸ He pohaku e okupe ai, a he pohaku hoohihia hoi, i ka poe i okupe i ka olelo, ka poe hoolohe ole; e like me ke koho mua ana.
- ⁹ Aka, o oukou, he hanaunai waeia, he poe kahuna alii, he aupuni kanaka hemolele, he poe kanaka nona ponoi; i hoike aku ai oukou i ka maikai o ka mea nana oukou i hea mai,

mai loko mai o ka pouli a i ka malamalama
kupanaha ona.

10 Aole oukou he aupuni mamaua, aka, i keia manawa, he aupuni oukou no ke Akua; ia manawa, aole oukou i alohaia, i keia manawa ua alohaia mai no.

11 E na pokii e, ke nonoi aku nei au ia oukou, me he poe malihini la, a me he poe lewa la, e hoomamao aku oukou i na kuko o ke kino, i na mea ku e i ko ka uhane.

12 A e noho pono hoi oukou, iwaena o ko na aina e; i hoonani aku ai lakou i ke Akua, ke hiki mai ka la o ka ike ana mai, no ko lakou ike ana i ka oukou hana maikai, ma ka mea a lakou e ohumu nei ia oukou, me he poe hana hewa la.

13 Nolaila, e hoolohe pono oukou i ka na luna kanaka a pau no ka Haku: ina ma ka ke alii nui e like ia me he Moi la;

14 Ina ma ka na kiaaina, e like ia me na mea i hoounaia e ia no ka hoopai una i ka poe hana hewa, a no ka hoomaikai ana aku i ka poe hana maikai.

15 No ka mea, pela ko ke Akua makemake, ma ka hana maikai ana, e pilipu ai ia oukou ka naaupo o ka poe ike ole.

16 Me he poe kauwa ole la, aole nae e hoolilo ana i ko oukou hookauwa ole ia i mea e uhi ai i ka hewa, aka, e like me na kauwa a ke Akua.

17 E hoomaikai aku i na mea a pau: e aloha i na hoahanau: e makau i ke Akua: e hoomaikai i ke alii.

- 18 E na, kauwa, e noho pono oukou malalo o ko oukou mau haku, me ka makau nui aku; aole i na haku maikai wale no, a me ka oluolu, aka, i ka poe oolea no hoi kekahī.
- 19 No ka mea, eia ka i ku i ka pono, ina no ka manao i ke Akua, e hoomanawanui ai kekahī i ke kaumaha no ka hooluhi hewa ia.
- 20 Auhea hoi ka mahaloia mai, ke hoomanawanui oukou i ke kuiia mai no ko oukou mau hewa iho? Aka, ina e hoinoia mai oukou, no ka oukou hana maikai ana, a hoomanawanui oukou, oia ka pono i ke Akua.
- 21 No keia mea, i heaia mai oukou: no ka mea, ua hoinoia o Kristo no kakon, a ua waiho oia no oukou i kumu hana, i hahai aku ai oukou ma kona mau kapuwai;
- 22 Ka mea i hana hewa ole, aole hoi i ikeia ka apaapa ma kona waha.
- 23 Aia kuamuamuia mai oia, aole ia i kuamuamu hou aku; a i kona hoehaia, aole ia i olelo hooweliweli aku; aka, haawi aku oia ia ia iho i ka mea nana e hoopai mai ma ka pololei.
- 24 Nana iho no i hali i ko kakon hewa ma kona kino iho maluna o ka laau, i make ai kakou i ka hewa, e ola ai i ka pono; ua hoolaia hoi oukou e kona mau palapu.
- 25 No ka mea, ua like oukou me na hipa e hele hewa ana; aka, ua hoihoiia mai nei oukou i ke Kahuhipa, a me ka Lunakiai o ko oukou mau uhane.

3

- ¹ O OUKOU hoi, e na wahine, e noho pono oukou malalo o ka oukou mau kane iho: alaila, ina malama ole kekahī o lakou i ka olelo, e hoohuliia mai lakou, me ka olelo ole aku, no ka noho maikai ana o na wahine;
- ² I ko lakou ike ana mai ia oukou e noho maemae ana me ka makau.
- ³ A i ko oukou kahiko ana, aole o ko waha, o ka hili ana i ka lauoho, a me ke komo ana i ke gula, a me ka aahu ana i ka aahu;
- ⁴ Aka, e kahiko oukou i ke kino ike ole ia o ka naau, ma ka mea palaho ole, o ka manao akahai a me ka noho malie; oia ka waiwai nui imua o ke Akua.
- ⁵ Pela i kahiko ai na wahine haipule ia lakou iho, i ka wa mamua, o ka poe i hilinai i ke Akua, e noho pono ana malalo o ka lakou mau kauē iho:
- ⁶ E like me Sara i hoolohe ai ia Aberahama, me ke kapa ana aku ia ia he haku; he poe kaikamahine hoi oukou nana, ke hana maikai aku oukou, me ka hoomakau ole ia mai i kekahī mea makau.
- ⁷ O oukou no hoi, e na kane, e noho pono oukou me lakou, ma ka naauao, e hoomaikai aku ana i ka wahine me he ipu palupalu la, me he mau hooilina pu la o ke ola maikai; i ole ai e nookiia ka oukou pule.
- ⁸ Eia hoi ka hope, e lokahi ko oukou manao a pau, e lokomaikai kekahī i kekahī; he poe aloha hoahanau, e menemene hoi, a e akahai.

- ⁹ Mai hoihoi aku i ka ino no ka ino, aole hoi ke kuamuamu no ke kuamuamu; e okoa ka oukou, o ka hoomaikai aku; e ike hoi oukou, na heaia mai oukou ilaila, i hooiliia mai ia oukou ka hoomaikaiia.
- ¹⁰ O ka mea manao e pomaikai i kona wa e ola nei, a e ike i na la oluolu, ua oki kona alelo ke pane aku i ka hewa, a me kona lehelehe i ka olelo ana i ka apaapa;
- ¹¹ E hoalo ae oia i ka hewa, a e hana hoi i ka mea pono; e imi i ke kuikahi, a malaila e hahai aku ai.
- ¹² No ka mea, ke kau nei na maka o ke Akua, maluna o ka poe pono, a ke lohe nei kona pepeiao i ka lakou pule; aka, ua hoomaka-e ka Haku i Ka poe hana hewa.
- ¹³ Owai la hoi ka mea hana ino aku ia oukou, ke hahai oukou mamuli o ka mea pono?
- ¹⁴ Aka, ina eha oukou no ka pono, ua pomaikai oukou. Mai makau oukou i ko lakou hooweliweli ana, aole hoi e pihoihoi;
- ¹⁵ Aka, e hoano i ka Haku i ke Akua, iloko o ko oukou naau. E makaukau mau oukou e hoomaopopo aku i ka poe e ninau mai ia oukou i ke kumu o ka lana ana o ko oukou manao, me ke akahai, a me ka haahaa.
- ¹⁶ E ao hoi, i hala ole ka manao; i hilahila ka poe hakuepa i ko oukou noho pono ana iloko o Kristo, no ka lakou olelo hewa ana ia oukou, me he poe hewa la.
- ¹⁷ Ina manao mai ke Akua pela, e aho ko oukou eha ana no ka hana maikai ana, aole no ka hana ino ana.

- ¹⁸ No ka mea, ua make no hoi o Kristo no ka hewa, o ka mea pono no ka poe hewa, i alakai oia ia kakou i ke Akua: ua pepehiia oia ma ke kino, ua hoolaia hoi ma ka uhane;
- ¹⁹ Pela ia i hele ai, a ao aku no hoi i na uhane e noho nei ma kahi paahao;
- ²⁰ I ka poe i hoomaloka mamua, i na la o Noa, i ka wa i kakali ai ko ke Akua ahonui, i ka hoomakaukau ana i ka halelana, malaila i hoolaia'i kekahia poe uuku, ma ka wai, ewalu hoi lakou.
- ²¹ Ma ia mea, o ka bapetizo ana, ka mea i hoailon-aia, oia ka mea e hoola mai nei ia kakou, (aole nae o ka holoi ana o ka paumaele o ke kino, aka, o ka hoomaopopo ana i ka manao maikai i ke Akua,) ma ke alahouana o Iesu Kristo:
- ²² O ka mea i hele aku i ka lani, a oia hoi ia e noho la ma ka lima akau o ke Akua; a ua hoonohoia malalo iho ona, na anela, a me na mea kiekie a me na mea mana.

4

- ¹ U A eha o Iesu ma ke kino no kakou, nolaila e hoomakaukau no oukou i manao like; no ka mea, ina e eha kekahia ma ke kino, ua hookaawaleia oia i ka hewa;
- ² I ole oia e noho hou aku i kona manawa e koe ma ke kino, mamuli o ke kuko kanaka, aka, mamuli o ko ke Akua makemake.
- ³ No ka mea, o ka manawa i hala o ka kakou ola ana, ua nui ia e hana aku ai i ka makemake o ko na aina e, i ko kakou hahai ana i ka makaleho, a me ke kuko, a me ka pakela inu

waina, a me ka ahaaina hooipoipo, A me ka aha inu, a me ka malama kii e hoowahawa-hia'i.

- ⁴ Ke kahaha nei no lakou me ke kuamuamu mai i ko oukou holo pu ole ana me lakou i ka hoomaunauna ino.
- ⁵ E hoike auanei lakou ia lakou iho, i ka mea i makaukau e hookolokolo mai i ka poe ola a me ka poe make.
- ⁶ Nolaila hoi i haiia'ku ai ka olelo maikai i ka poe i make, i hoohewaia lakou e kanaka ma ke kino, a i hoalaia hoi lakou e ke Akua ma ka Uhane.
- ⁷ Ua kokoke mai no ka hopena o na mea a pau; nolaila, e kuoo oukou, a e kiai ma ka pule.
- ⁸ Eia ka mea oi mamua o na mea a pau, o ka pumahana o ke aloha iwaena o oukou; no ka mea, o ke aloha ka mea e uhi ai i na hewa he nui loa.
- ⁹ E hookipa maikai oukou i kekahī i kekahī, me ka ohumu ole.
- ¹⁰ E like me ka haawina i loaa mai i kekahī a me kekahī, pela e haawi aku ai kekahī i kekahī, e like me na puuku pono o ko ke Akua lokomaikai ano e.
- ¹¹ Ina e olelo aku kekahī, e olelo ia e like me ka olelo a ke Akua; ina e lawelawe kekahī, e hana no ia me ka ikaika a ke Akua i haawi mai ai, i hoonaniia ke Akua ma na mea a pau, ma o Iesu Kristo la; ia ia no ka hoonaniia, a me ka mana mau loa, i ke ao pau ole. Amene.

- ¹² E na pokii e, o ka pilikia e hiki mai ana io oukou la, i mea e hoao mai ai ia oukou, mai haohao oukou ia mea, me he mea hou la e hiki mai ai ia oukou:
- ¹³ Aka, e olioli oukou, no ka mea, he poe hoaeha pu oukou me Kristo; i mea e hauoli loa ai oukou i ka wa e hoikeia mai ai kona nani.
- ¹⁴ Pomaikai oukou, ke hoinoia oukou no ka inoa o Kristo; no ka mea, ua kau mai ka Uhane nani o ke Akua maluna o oukou: ma o lakou la, ua kuamuamuia oia; aka, ma o oukou nei, ua hoonaniaa oia.
- ¹⁵ Mai lilo kekahia o oukou i ka hoehaia, me he pepehi kanaka la; a me he aihue la, a ma ka hana hewa, a ma ka hoohaunaele.
- ¹⁶ Aka, ina i hoehaia kekahia no Kristo, mai hilahila oia; aka, e hoonani aku oia i ke Akua no keia mea.
- ¹⁷ No ka mea, e hiki mai auanei ka manawa e hoomaka ai ka hoohewaia ma ko ka hale o ke Akua; a ina ma o kakou nei ka mua, heaha la uanei ka hope o ka poe i malama ole i ka euanelio a ke Akua?
- ¹⁸ A ina he mea aneane hiki ole ke ola ana o ka poe pono, mahea la uanei kahi e ike a i ka poe aia, a me ka hana hewa?
- ¹⁹ No ia mea la, ea, o ka poe i hoehaia mai mamuli o ka manao o ke Akua, ma ka hana pono lakou e kauoha aku ai i ko lakou uhane ia ia, i ka mea hoopono nana i hana.

5

- ¹ O WAU o kekahia luna kahiko, a he mea hoike i ko Iesu eha ana, a he hoaaloa pu no ka nani e

hiki mai ana, ke nonoi aku nei au i na luna
kahiko o oukou.

²E hanai oukou i ka poe o ke Akua iwaena o oukou,
e kiai ana, aole no ka hookoia mai, no ka
makemake no; aole hoi no ka puni waiwai,
aka, no ka inanao pono.

³Mai hana hoi, me he poe alii la maluna o ka ekale-
sia, aka, me he poe kumu la, i hoomahuiia'i
e kela poe.

⁴A hiki i ka wa e hoikeia mai ai ke kahuhipa nui,
alaila e loaa ia oukou ka lei nani loa, aole loa
e mae.

⁵O oukou, e ka poe opiopio, e noho pono oukou
malalo o na luna kahiko. O oukou hoi a
pau, e noho pono oukou, kekahia malalo iho
o kekahia, a e hoouhiia oukou i ka manao
hoohaahaa; no ka mea, ua ku e ke Akua i ka
poe hookiekie, aka, ke lokomaikai nei oia i
ka poe hoohaahaa.

⁶Nolaila, e hoohaahaa oukou ia oukou iho malalo
ihohi o ka lima mana o ke Akua, i hookiekie
ae oia ia oukou i ka wa pono.

⁷E waiho aku i ko oukou kaumaha a pau maluna
ona; no ka mea, ke manao nei oia ia oukou.

⁸E kuoo, a e makaala; no ka mea, e like me ka
lionia uwo, pela no e holoholo nei ko oukou
enemi, o ka diabolo, e imi ana i kana mea e
ale ai.

⁹E pale aku oukou ia ia, me ke kupaa ma ka
manaoio, me ka ike pono hoi, ua hooluhi pu
ia ko oukou poe hoahanau, e noho ana i ke
ao nei, ia luhi hookahi no.

- ¹⁰ Aka, o ke Akua, nana mai ka lokomaikai a pau,
o ka mea i hea mai ai ia kakou nei i ka nani
mau loa, ma o Kristo Iesu la, mahope o ko
oukou eha pakole ana, nana no e hoolilo ia
oukou i hemolele loa, a e hookumu hoi, a e
hooikaika, a e hookupaa ia oukou.
- ¹¹ Ia ia no ka hoonaniia, a me ke aupuni mau loa i
ke ao pau ole. Amene.
- ¹² Ma o Silevano, he hoahanau pono o oukou i ko'u
manao, ua palapala pokole aku au ia oukou,
me ka hooikaika aku, a me ka hoike aku i ka
lokomaikai oiaio o ke Akua, kahi a oukou e
ku nei.
- ¹³ Ke aloha aku nei ka poe i wae pu ia me oukou ma
Babulona nei; a o ka'u keiki hoi o Mareko.
- ¹⁴ E aloha oukou i kekahī i kekahī, me ka honi
aloha. E maluhia oukou a pau loa, ka poe
iloko o Kristo Iesu. Amene.

**Baibala Hemolele
The Holy Bible in the Hawaiian language of the United
States, 1868 revision**

Public Domain

Language: 'Olelo Hawai'i (Hawaiian)

Translation by: na na misionari i pai

2015-11-10

PDF generated using Haiola and XeLaTeX on 18 Apr 2025 from source files
dated 31 Aug 2023

4fde4536-9f74-574b-8404-d9ec34a30cbb